

Razrješenje ministra finansija FBiH je pravno upitno

Odluka predsjednika Federacije Bosne i Hercegovine (FBiH) Živka Budimira od 3. januara 2014., kojom razrješava dužnosti ministra finansija Antu Krajinu na osnovu prijedloga premijera FBiH Nermina Nikšića od 10. decembra 2012., izgleda pravno upitna.

Predsjednik Budimir je već ranije, 17. decembra 2012., odlučio da ne prihvati prijedlog premijera Nikšića za smjenu osam ministara u Vladi Federacije, uključujući i zahtjev za smjenu ministra finansija Krajine. Također, razlozi za odluku o razrješenju ministra finansija Krajine koje je predsjednik Budimir naveo u javnosti, različiti su od razloga koji su navedeni u prijedlogu premijera Nikšića iz decembra 2012.

Prema postojećim zakonima, ministar finansija ima nezamjenjivu ulogu u realizaciji transakcija vezanih za isplate iz budžeta u FBiH, uključujući i isplate najugroženijim slojevima društva, kao i povjeriocima. Zbog tih i drugih funkcija koje ministar finansija vrši po službenoj dužnosti, jasno je da je ta pozicija od ključne važnosti za fiskalnu stabilnost i funkcioniranje ne samo FBiH nego i cijele BiH.

Također, politički je neodgovorno gubiti još više vremena na pokušaje restrukturiranja Vlade FBiH, umjesto da se rješavaju stvarni problemi sa kojima se građani suočavaju, poput rastuće nezaposlenosti, loše infrastrukture i korupcije.

OHR stoga poziva predsjednika FBiH da poništi odluku od 3. januara 2014. ili da je izmijeni tako da osigura da ministar finansija može i dalje obavljati svoje funkcije sve dok se ne imenuje njegov nasljednik ili dok sud ne odluči drugačije.